



IV GOVERNO CONSTITUCIONAL SECRETARIA DE ESTADO DO CONSELHO DE MINISTROS

KOMUNIKADU BA IMPRENSA

Sorumutu Konsellu Ministru, loron 3, fulan Juñu 2011

Konsellu Ministru hala'o sorumutu iha Sesta-feira, loron 3 fulan Juñu tinan 2011, iha Sala Sorumutu Konsellu Ministru nian, iha Palásiu Governu, iha Dili, no aprova:

1. Dekretu Lei kona-ba Jestaun no Alienasaun Patrimóniu Estadu nian

Dekretu lei ne'e regula prosedimentu sira atu Estadu bele halo jestaun ida ne'ebé di'ak liu kona-ba ninia patrimóniu ho kustu ki'ik liu nomós atu operasaun sira ne'ebé iha relevánsia ba alienasaun bein móvel bele halo ho transparénsia tanba rejime jurídiku bein móvel sira Estadu nian sei falta hela regulasaun balun iha área ida ne'e.

Objetivu diploma ida ne'e nian atu aumenta litán efisiénsia no rasionalizasaun ba rekursu públiku sira no adekuasaun ba organizasaun Estadu nian.

2. Proposta Lei kona-ba alterasaun dahuluk ba Lei Fundu Mina-rai nian

Proposta lei ne'e hakarak altera regra no prinsípiu sira investimentu nian, hodi fó fleksibilidade boot ida kona-ba diversifikasaun karteira aplikasaun nian atu bele aumenta retornu husi investimentu iha tempu oin mai, iha kuadru definisaun loloos kona-ba limite espozisaun ba risku. Lei ne'e sei klarifika mós rekizitu hirak ne'ebé Governu atu kumpri bainhira presiza duni halo transferénsia ida ba Orsamentu Jerál Estadu nian liu Rendimentu Sustentável Estimada, hodi promove iha futuro, fleksibilidade kona-ba entidade ne'ebé sai nu'udar responsável ba Jestaun Operasionál direta. Iha mós alterasaun ba regra nomeasaun membru sira nian no kompozisaun Komité Asesoria ba Investimentu.

Dokumentu prinsipál ida husi dokumentu hirak ne'ebé konsidera durante revizaun Lei ne'e nian prodús ona husi Grupu Traballu internasionál kona-ba " Fundu ba Rikeza Soberana" (Fundu Soberanu sira): Prinsípiu no Prátika hirak ne'ebé ema hotu-hotu simu, bolu mós ho naran "Prinsípiu Santiago nian". Prinsípiu sira ne'e reprezanta esforsu ida husi kooperasaun internasionál identifikasaun nian kona- ba prátika sira ne'ebé di'ak ba jestaun fundu sira ne'e nian, liuliu, iha área governasaun no polítika

investimentu nian sira ne'ebé Governu propoin revizaun atuál Lei Fundu Mina-rai nian tuir prinsípiu sira ne'e, ho objetivu atu asegura katak Timor-Leste kontinua sai nu'udar ezemplu ida kona-ba prátika internasionál ne'ebé di'ak liu iha nível jestaun ba Fundu hanesan ne'e.

Atu dehan mós katak, Lei Fundu Mina-rai nian (n.º 9/2005, loron 3 fulan Agostu) determina revizaun ida husi parte Governu, tinan lima hafoin konstituisaun Fundu Mina-rai nian, ne'ebé estabelese iha fulan Setembru tinan 2005.

3. Política kona-ba Dívida Pública

Política kona-ba Dívida Pública atu hodi estabelese baze ida hodi fasilita hetan empréstimu Esternu entre Governu Timor Leste nian ho institusaun multilateral no bilateral sira finansimentu nian, atu suplementa nesidade finansimentu nian sira kona-ba Planu Dezenvolvimentu Estratéjiku (PDE).

Determina: política jerál (justifikasaun atu hetan impréstimu no prinsípiu jerál sira, Governu tenke adere, inklui sustentabilidade dívida no jestaun transparente); jestaun kustu nian, no risku hetan impréstimu nian, inklui sustentabilidade fiskál ne'ebé metin (montante ne'ebé atu hetan iha termu no kondisaun sira); estabesimentu kuadru ida ne'ebé favorável atu hetan impréstimu (presiza implementa regra sira tuir lei no instituisaun nian atu garante jestaun dívida nian ida ne'ebé di'ak).

Política ne'e hakarak abranje tinan fiskál sira 2011 to'o 2015 ka, tinan lima dahuluk PDE nian (husi tinan 2011 to'o 2030). Durante período ida ne'e, política tenke hetan revizaun no alterasaun ne'ebé la'o nafatin bainhira presiza duni atu fó resposta ba alterasaun tempu nian.

4. Proposta Lei kona-ba Konstituisaun, Emisaun no Jestaun ba Dívida Pública

Ho aprovasaun Lei n.º 13/ 2009 loron 21 fulan Outubru, kona-ba Orsamentu no Jestaun Financeiru, mosu ba dahuluk iha ordenamnetu jurídku Timor-Leste nian possibilidade Estadu nian atu hetan empréstimu hodi finansia despeza pública sira.

Tanba ne'e mak importante duni atu defini prinsípiu estratéjiku sira ne'ebé tenke orienta konstituisaun no emisaun dívida pública hosi parte Estadu nian, nu'udar dalan atu salvagurda interese nasaun nian. Prinsípiu sira ne'e ida hatuur iha faktu katak dívida pública ne'e la'ós atu finansia despeza korrente Estadu nian, maibé despeza ne'ebé mak kontribui ba dezenvolvimentu estratéjiku país nian.

Define mós katak rekursu atu halo hetan dívida pública tenke bazeia ba nesidade finansimentu ne'ebé mosu husi ezekusaun tarefa prioritária sira estadu nian, ne'ebé iha relasaun ho harii infraestrutura estratéjika sira ba dezenvolvimentu país nian, no katak kustu dívida pública nian labele aas liu husi retornu ekonómiku investimentu públiku nian.

Objetivu prinsipál lei ne'e nian mak garante nesesidade finanseira Estadu nian no kumprimentu obrigasaun hirak ne'ebé mosu bele satisfáz ho folin ne'ebé ki'ik liu iha prazu médiu no prazu naruk ho dalan ne'ebé konsistente no ho grau risku nian ida ne'ebé ki'ik liu.

Nune'e, diploma ida ne'e aprova rejime jerál ba konstituisaun, emisaun no jestaun ba dívida públíka, hodi halo jestaun ida ne'ebé eficiente no ekilibrada ba dívida.

5. Dekretu-Lei ne'ebé kria Kompañia Investimentu Timor-Leste nian

Diploma ida ne'e reflète kompromisu Governu nian atu estabesele instituisaun hirak ne'ebé mak prezisa atu garante baze hirak ne'ebé seguru ba dezvoltimentu ekonomia nasaun nian. Finalidade Kompañia Investimentu Timor-Leste nian mak atu promove dezvoltimentu oportunidade investimentu nian sira no kreximentu riku-soin nasaun nian, hodi lori projetu estratéjiku sira ne'ebé importante liuliu iha komérsiu nian.

Ho objetivu atu promove investimentu iha setór ekonomia nasional nian sira, ne'ebé importante tebes ba dezvoltimentu nasaun nian, no haree mós ba pasajen husi ekonomia ne'ebé bazeia ba mina-rai ba fali ekonomia la'ós mina-rai nian iha Timor-Leste, mak kria estrutura ida ne'e nu'udar parte emprezariál Estadu nian.

6. Rezolusaun Governu nian atu Tulun Vítima sira Tornadu nian Iha Estados Unidos Amerika (EUA).

Iha parte sentru no sul Estados Unidos América nian (EUA) foin lalais ne'e sofre estragu husi tornadu hamutuk 300, hodi halo ema barak mak mate, kanek no hamosu destruisaun boot liuliu iha Estadu sira hanesan Mississipi, Alabama, Tennessee no Missouri.

Ida ne'e afeta ema tokon barak, ne'ebé agora moris susar tebes, sein infraestrutura bázika hanesan ospítal, eskola no hela-fatin ne'ebé merese atu hela.

Tanba konsidera katak solidariedade no fraternidade entre povu mak sai hanesan prinsípiu fundamentál hirak ne'ebé hatuur iha Lei-inan, no haree mós ba lasu amizade nian ne'ebé kesi Timor-Leste no EUA, liuliu iha área militar nian, Konsellu Ministru rezolve hodi aprova fó tulun osan dolar américa nian hamutuk rihun 500 ho objetivu atu fó assisténsia umanitária ba populasau ne'ebé afetada.

7. Rezolusaun Governu nian ba Nomeasaun Komisáriu ida ba Komisaun Funsau Públika

Iha sorumutu loron 25 fulan Maiu nian, Konsellu Ministru nomeia, Isabel da Costa Ferreira atu ezerse mandatu ida iha rejime dedikasaun parsial, to'o loron 12 fulan Agostu tinan 2014, nu'udar Komisária ba Komisaun Funsau Públika, hodi troka fali Komisária Maria Olandina Caeiro, ne'ebé simu nomeasaun ba Funsau seluk Estadu nian.

8. Nomeasaun ba membru sira ne'ebé atu halo parte iha Konsellu Superiór Ministériu Públiku nian.

Iha sorumutu loron 25 fulan Maiu nian, Konsellu Ministru nomeia José Pedro Mariano de Camões no Pedro E. A. De Oliveira nu'udar membru efetivu no suplente Konsellu Superiór Ministériu Públiku nian.

Konsellu Ministru analiza mós:

1. Rezultadu Sensu 2010 nian – Relatóriu 2, 3 no 4

Diresaun Nasionál Estatíska nian apresenta, ba Konsellu Ministru, relatóriu 2, 3, no 4 husi Sensu 2010 nian.

Relatóriu 2 refere ba dadus kona-ba Populasaun no agregadu familiár, relijiaun, sidadania, lian-inan, estadu sivíl no migrasaun; Relatóriu 3 ko'alia kona-ba edukasaun, servisu, invalidéz, estadu hela-fatin nian, produsaun to'os no animál nian; relatóriu 4 hato'o informasaun nivel suku nian husi suku hamutuk 442 ne'ebé iha, hanesan: populasaun labarik kiik (tinan 5), edukasaun, servisu estadu hela fatin nian no produsaun to'os no animál nian.

Relatóriu hirak ne'e sei publika iha sítiu internet Diresaun Nasionál Estatística nian (www.dne.mof.gov.tl) no Ministériu Finansa nian (www.mof.gov.tl). Sei hala'o *workshop* iha distritu hotu-hotu hodi fahe mós livru sira ne'ebé mak fó esplikasaun kona-ba asuntu hirak ne'e. Lansamentu relatóriu hirak ne'e nian prevee ba fulan Jullu, molok hala'o Sorumutu Timor-Leste ho Parseiru Dezenvolvimentu sira (akrónimu inglés: TLDPM).